

22. oktober 2013

UKA 2013/83
Per Berthelsen

Dansk Institut for Internationale Studier, DIIS, pillugu inatsisip Kalaallit Nunaannut atortuulersinneqarnissaanut Naalakkersuisut peqquneqarnissaannut Inatsisartut aalajangiiffisassaattut siunnersuut, tassa imaalisinnaangorlugu Inatsisartut Naalakkersuisullu DIIS-miit nalunaarutinik nassuiaatinillu piniarsinnaangorlugit, Inatsisartut Naalakkersuisullu DIIS-imik atuisinnaanerat annertusarlugu.
(Inatsisartunut ilaasortaq Sara Olsvig Inuit Ataqtigiit)

Sara Olsvig Inuit Ataqtigiit siunnersuutimini saqqummiuppaa, Dansk Institut for Internationale Studier - ulluinnarni taajuuteqartinneqartoq DIIS - pillugu inatsit naalakkiutigineqasasoq Kalaallit Nunaanni atuuttussangorlugu, tunngavilersuutigineqarluni DIIS Kalaallit Nunaannut issittumilu pissutsinut attuumajartuinnarnera, tassa sillimaniarnermut, illersornissamat nunanullu aallanut politikkitimut tunngasunut.

Tamanna pillugu Siumumiit siunnersuuteqartoq isumaqatigaarput.

Taamaattumik eqqumiittutut isiginngilarput siunnersuuteqartoq kissaateqarluni saqqummiussimmat Inatsisartut Naalakkersuisullu annertunerusumik DIIS-imik atueqqullugit - DIIS qallunaat naalakkersuisuisa ataaniippoq arlaannaanulluunniit attuumassuteqarani nunarsuarmioqataanerup iluani tunngaviusumik ilisimatusarfiulluni.

Namineerlunga DIIS-imik misilittagara siunnersortinik marlunnik ataatsimeeqateqarnermik imaqarpoq, DIIS-imi siunnersortimik taamatuttaaq Center for Militære Studier-meersumik. Tamanna ukialuit siorna pivoq Aningaasaqarnermut Nunanullu Allanut Naalakkersuisuunerma nalaani. Taamani Grønlands Kommandop kingusinnerusukkut Arktisk Kommandonngortup inissisimanagera pilluu apersorneqarama. Taamani Grønlands Kommando nunatsinniiginnassanersoq immaqaluunniit Savalimmiuniilissanersoq ataatsimiissutigaarput. Siumup nuannaarutigaa Arktisk Kommando nunatsinniiginnarmat.

Naalakkersuisut akissuteqaatiminni ersarissuliuutigaat ilisimatusarneq pillugu tapersersuiermik minnerunngitsumillu arlaanaanulluunniit attuumassuteqanngitsumik misissueq-qissaarsinnaaneq nunarsuarmioqatitsinnut qaffasissumik assersuunneqarsinnaasoq, taamaattumik siunnersuut oqallisigissallugu naleqqulluinnartuummat erseqqissarlugulu Danskil Nunanut Allanut Ministereqarfiannut oqaloqatiginninnermik aallartitserusukkamik soorluttaaq DIIS-imik siumut isigisumik qaninnerusumillu suleqatigiissinnaanerup periarfissaqarsinnaanera qimerloorumallugu.

Maannamut Naalakkersuisut nunarpullu periarfissaqareerput immikkut ilisimasalinnik nunatta avataaniittunik atuisinnaallutik suliakkiuteqarsinnaallutilluunniit, immikkut inatsis-inik atortuulersitsinngikkaluarlutik. Tamanna periarfissaq iluaralugu ataqqillugulu Siumup siunnersuut itigartippaa.